

TAMITYA CATERA TESADONICA JANVAJYU

Pávuvedabay nuyadara catera Tesadónicamu siityariyvavedabajyu

1 ¹Ray Pávuru, Sinubánuta, Timutévuta jarye, nuñúrya catera jiryeyyu, Tesadó nicamu vichavay, jiryatiy savicha Vuryíndenu jiryeyje, savicha Jesucrístu jiryentyityuntiy. ²Samirya jiryeycha, samirya racha jiryeyechiy varidye, Vujye Jüdenumusi, Nutyityu Jesucrístumusi jarye racha darya jiryeyyu.

Satanuvunu Jüdenu riy juuchataway sanumatiy jutí Crístu

³Nuryijchanatyasarani Jüdenu jiryenchiy, ratyeryiveda, daryanuma nutyu samirya nta rasanuma jaryi jiryetyuvachoda Jüdenumu, jamuravajunuma jiryevyatada nuñi tiquimusiy jiryedye. ⁴Daryamusiy nuñi tuchunumaya Jüdenu siityariyvajyuva jiryenchiy, nuñichanaty varyi jiryey, jiryatiy jiryetyuvachodamucha simu Jüdenu parucharinübera, riryavittuyada nijyanvay varyi jiryey, jiryeyechintyara jarupadoda.

⁵Ramusiy jita vjadichara darya Jüdenu murichedoda samiy, satidye jtay: “Jiryeni jita rasaravay varidye rañsujyomu jayadaju,” ne jiryinuy ramu jayasadiva jarupanusavay jiryedye. ⁶Jüdenu raparutyatanijeya rivantidyeryi rityi parutyatanijeya jiryentyidye.

⁷⁻⁸Sasay varyi jiyuyada jiryey, jiryatiy jarupanusavay daryaju

jiryevyichanuyada, jiryatidye jiyuy varyi nudiyisa, sanumatiy dityanu Nutyityu Jesús varyi jarichumusi, supavajyu yisa, jiryatiy sajpa jivyanuyadara riy; satidye murichenutaniy jiidatya variryi, jaryi quivedatara, jiryatiy ne ridyetyaryu daryajuni Jüdenu, ne rityuvachuruy ramu samituchoda sanchiy Vuyntyityu Jesúsntiy. ⁹⁻¹⁰Riñi jmutyara ramurichenusada, riryaparutaye Jüdenu momusi, sada vandamusiy, jiryatiy savanuyadadara, sanumatiy jutí satidye vicha vanda nuyadatí jiyiyintyasavamyu, sachá tittasi varyi rijyu titaju simu tuvachuvay variyundamu, jiryatiy jiryetyuvachoda daryaju nutyuchodamu. ¹¹⁻¹²Ramuníty nutyuchusara sisa Vuryíndenu jiryeyadaju, satidye bay rasaravay varyi jiryey, sanatuyadaju, (jiryatiy sanatuy yentyuyadaju vuy), satidye jtotaniy varyi jiryimura titaju samiy jvaaryuyada, titaju jvaayada jiryatiy jiryivaay jityuvachodamura, savanuyadara, riryatidye jchanaty nijyanvarya Vuyntyityu Jesús jtya, riryajchanaty jiryimusirya, riryajchanaty simusi jiryentyidye, Vuryíndenu jmutyadara, Nutyityu Jesucrístu jmutyadara jarye.

Juuchuvada jami

2 ¹⁻²Nujechiñuy jita jiryiva, ratyeryiveda, ne jiryeycha vanira siquityavay jiryeyechipiyadamu, ne rajnutay jiryeyechiy varyi ranchiy,

Vuyntyityu Jesucristu mutijadanchiy, jiryatiy vuryantyeryaniy variy sidchoju vuy. Ne rasiquitya jiryejehiy variy saryityi tuchu ti jiryiva: “Rajotanuma Nutyityu runda,” dantyamuy ne saryityi jtay sadatya Judenu Jnutumusirya, dantyamuy ne saryityi jtay satuvachu rañiquera, dantyamuy ne saryityi jtay sumutyara catera rimusiy. ³Ne jiryaquivuchutaniy tityayu, mitya. Ne jiryinuy ne rajota Nutyityu runda, netimyu ne riryajanumitye nijyanvay sayaroju Judenu, netimyu ne sadityanu juuchadodajami dayu, nityi parutedajusi day. ⁴Nini mityasiiyanu sayaroju titaju jiryatiy rutay Judenu dani, sadirya jibeyada variy jaryinuyu, titaju nijyanvay vatasiju, jasicharajutiy samasa Judenu vichajomu, Judenu nta sadityadoda variyu. ⁵Ne viy jiryejehipityara jiryatiy ratyuchoda jiryivara, variñumatiy ravychada jiryisa. ⁶Diye jita jiryedyetyisatya tara richechujani, sañuma dityanu jiryundajisiyu. ⁷⁻⁸Tapi rivaañuma juuchaveda dutyadamusiyu, vinu nityi richechujá diyera, sarichechujá sasipyatedasaraju rajache-siyu, variñumatiy sadityanu juuchadodajamiyu, nityi sajvay Nutyityu Jesús jiñeryejadadata, sajvay jimyutijadadata variñi.

⁹⁻¹⁰Juuchadodajami mutijada jita racha Satanasiy vanutyadamusidyed, titaju vanuyadadata, datyadoda quivuchusarata jarye, tittasara quivuchusarata jarye risaju, titaju vacha quivuyadata rijyu parutisavay, jiryatimyu ne rityuvachuryada ramu sitenu niquejada day, riryatidyed vicha jantyutyasavay variy. ¹¹⁻¹²Ramunityi supasara Judenu ruumura vanutyada quivuyada, riryatidyed tuvachu quivuyadamu, riryatidyed vicha jatyasavay, rityimyu ne tuvachuruy ramu sitenu niquejada, rucanuyada jitara vacha vichada day.

Sajaryetada Judenu yentyutyadajuriy Tesadónica janvavedabay

¹³Nuy jita raryi jchanatyasarani Judenu jiryenchiy, ratyeryiveda, jiryatiy Nutyityu vatasavay jirye, tapi sajaryetada rajotyamusiy jiryedyed, jiryeyada rayadaju, jiintyadamusiy, jiryatiy sajiintya yimuju Yintuta jirye, tuvachodamusiy jarye jiryatiy jiryetyuvachoda ramu sitenu tuchoda.

¹⁴Ramu jita sanatuyada jirye samituchodata jiryatiy nutyuchura, jiryatidyed canarya Vuyntyityu vanda, jiryatiy Jesucristudá darya. ¹⁵Daryantya jita, ratyeryiveda, jiryantya surutyaniyu, jiryantya jiriryira datyadoda jiryatiy nudetyadoda jiryerya, varimyata nuñiquera, daryantya nuñuy cateravara.

¹⁶Vuyntyityu Jesucristu jita, Vujyed Judenu jarye, nityi vatada vuy, nityi sajeyasara jachisurutyada vuy, sasay samirya nutuyada vuy, samirya jachipiyajadamuju. ¹⁷Santya vanutyara jiryejehiy, santya surá jirye, jiryatidyed jvaay samirya titajura, jiryanique samirya titajuntirya.

Jiryatuchu Judenujsa nudyeyadaju

3 ¹Nuñitay jita tamitya, ratyeryiveda, jiryantya tuchu sisa Judenu nudyeyadaju, ratidyed ray Judenu niquejada, riryajchanatya nijyanvay varirya nutyu jiryichanatyatijiryerya. ²Jiryajachiñuy sivantij, satidyed jantyuy nudyiva riryajisijy taji jachipiyavay, vacha jvaavye jaryentij, jiryinuvyitya ne tuvachuvay titaju daryi. ³Jtotanirya jita Vuntyityu day, niday ravanutyá jirye, sajantyuy jiryiva, vacha jachipiyajada jamijisijy.

⁴Nudyetya jita Nutyityumu jiryenchiy, jiryatijiryivaarya nutyuchoda, jiryajvaajeyasarantirya. ⁵Santya vasenu

Nutyityura jiryejechiy, Jūdenu
vaṭadamuju, Crīstu jachidedamujūntiy.

Vuryecha jvaavye

⁶Nuñitay jīta jiryiva, ratyeryiveda,
Nutyityu Jesucristu jtyamu nuñitay:
Jiryajiintye riryajisiy vutyeryiveda
jiryatiy pituvyeryi, ne rityuvachuruy
variy ramu nudyetyadoda jiryatiy
jiryimutyajada nudyimusirya.

⁷⁻⁸Jiryeñi jīta datyara nutyuramusiy
jiryajantya nudyivaayada, nutyuramu
nuyvichanuyada ne pituvye jiryimu,
dantyamuy ne nuñimiyiñuyada mityara
tī jmyisara, nutyu parucharityi
nudyivaañuyada nupora jarye,
nuryiñuma jiyasanta riy jiryetyevay.

⁹Ne nuyvichasara jiryimysarata, nutyu
nusubymiy nuñavicha jiryimusiy,
nuñatidye barya jantyasara jiryeyu,
jiryatidye jvaay daryantidye. ¹⁰Nuñi
vichadanumatiy jiryisa nuñiteda variy
jiryiva: Nītimyu ne rajvaay, ne sajmyi.

¹¹Nutyuvachumā daryaju: Tavay
rupiñumaya jiryetyevay, pituvye, tama
ruvaaryuy, tama, mitya riityenumaya

tisa variyu. ¹²Davyevyani jīta
nuñitachara, nudyeyasanta jarye risaju
riy, Nutyityu Jesucristu jtyamu,
riryatidye jvaay samidye, riryatidye
jmyi variry nuñi jimyisara day.

¹³Jirye jīta, ratyeryiveda, ne
jiryaparuy riva samirya jvaayada.
¹⁴Nītimyu ne tuvachururya nuñiteda
caterava, jiryantya jnyu mitya sanacho,
jiryeñuma rupi sisa, satidye jada riva.
¹⁵Ne jiryajnyu variy jamiryamusiy
sanacho; jiryadatyanu samirya
vichadatanī, ne jiryinuy jityeryi dañi.

Sacha Jūdenu jiryisa

¹⁶Nīday jīta jiryatiy samirya vichada
jamini, santya sajeyasara jiryerya
samirya vichasada. Sacha Nutyityu
jiryisa titaju.

¹⁷Ramyuchuvay tamitya jirye, ray
Pávuru. Rañuy rajyomututara. Ranuma
ranicha rañurya racyaterava. ¹⁸Samirya
racha titaju jiryeyu, Vuyntyityu
Jesucristumusiy.

*Sayanuma jiryetyeryi
Pávuru*